

Президент қарорининг ижросига бағишланган семинар-йиғилишлар ўтказилди

Ўзбекистон Республикаси Президентининг 2017 йил 10 январдаги «Аҳолига транспорт хизмати кўрсатиш ҳамда шаҳарлар ва қишлоқларда автобусларда йўловчилар ташиш тизимини янада такомиллаштириш чора-тадбирлари тўғрисида»ги ПҚ-2724-сонли қарорининг мазмун-моҳиятини автомобилда ташувчиларга етказиш, жойларда унинг ижросини сифатли амалга ошириш мақсадида жорий йилнинг 30 январидан 15 февралигача Қорақалпоғистон Республикасида ва барча вилоятларда семинар-йиғилишлар ўтказилди.

Семинар-йиғилишларда вилоят ҳокимлиги мутахассислари, Агентликнинг норматив ҳужжатлар ишлаб чиқиш бўлими ва ҳудудий бўлимлари мутахассислари, Ўзбекистон Республикаси Молия вазирлиги, Давлат солиқ қўмитаси ва ИИБ ЙХХББ вакиллари ҳамда автомобилда ташувчилар иштирок этишди.

Семинар-йиғилишларда юқоридаги Қарор билан тасдиқланган «2017-2021 йилларда шаҳар ва қишлоқларда автотранспорт таъминоти даражасини янада ривожлантириш Дастури» доирасида амалга ошириш режалаштирилган чора-тадбирлар тўғрисида сўз юритилди, шунингдек Президент қарори ижросини таъминлаш юзасидан қабул қилиниши кутилаётган Ҳукумат қарори лойиҳасининг тақдимоти ўтказилди.

Қарорда белгиланган солиқ имтиёзлари, уларни тўғри ҳисоблаш ва бухгалтерия ҳисоботларини юритиш, бухгалтерия қонунчилигидаги ўзгаришлар, автостанцияларни қуриш ва реконструкция қилиш учун маҳаллий бюджетдан маблағларни жалб этиш механизмлари ҳамда янги автобусларни харид қилиш учун кредит ва лизинг олиш масалалари Молия вазирлиги мутахассислари томонидан атрофлича ёритилиб, тадбиркорларни қизиқтирган саволларга жавоб берилди.

Шу билан бир қаторда, Президент қарорига мувофиқ, йўловчилар ташишни бошқариш тизимига замонавий ахборот-коммуникация технологияларини кенг жорий этиш, жумладан, аҳолига шаҳар транспортда йўл ҳақини нақд пулсиз махсус пластик карточкалар ёрдамида амалга ошириш ва мунтазам йўловчилар ташиш йўналишларида банд бўлган автобус ва микроавтобуслар ишини масофадан онлайн режимида назорат қилиш (GPS) тизимларининг кенг имкониятлари, қулайликлари ҳамда ҳудудларда босқичма-босқич жорий этилишига бағишланган алоҳида тақдимот ҳам ўтказилди.

Семинар-йиғилишларда ташувчилар ўзларини қизиқтирган саволларга мутахассислардан батафсил жавоблар олишди. Бундан ташқари, уларнинг фаолиятида юзага келаётган муаммолар юзасидан таклиф ва ечимлар берилди.

Ўзбекистон автомобиль ва дарё транспорти агентлиги Ахборот хизмати